



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

*Komunikadu Imprensa*  
*Distritu Likísa*  
*23 Marsu 2015*

***Semináriu ba estudante ensinu sekundária:***  
**JSMP enkoraja estudante feto Likísa kontinua eskola direitu**

Iha 20 Marsu 2015, JSMP liu husi Unidade Justisa ba Feto no Labarik (WCJU) realiza semináriu ba estudante ensinu sekundária feto iha Eskola Sekundáriu Públiku Jerál Munisipiu Likísa. Semináriu ne'e ho tema " Enkoraja estudante feto hodi hili fakuldade direitu bainhira akaba sira nia estudu."

Antes realiza semináriu ne'e, JSMP hato'o pedidu ba autóridade eskola no hetan autórizasaun ba realiza atividade, maibé tenke mós halo koordinasaun ho edukasaun munisipiu nune'e bele iha koñesimentu kona-ba programa ne'ebé JSMP realiza iha eskola ne'e.

Iha koordinasaun ho autóridade edukasaun, JSMP mós apresenta asuntu ne'ebé sei hato'o iha semináriu kona-ba direitu umanus, violénsia bazeia ba jéneru, prosesu justisa formál no kna'ar autór judisiáriu nian.

Diretór edukasaun Munisipiu Likísa Sr. Laurentinho Paixão akresenta katak atividade hotu-hotu ne'ebé realiza atu hasae koñesimentu estudante nian, ne'e perténsia ba sosiedade nia responsabilidade.

Reforsa mós husi xefe departementu asuntu ensinu sekundária Sr. Zito Antonio da Costa Oliveira katak sei rekomenda ba eskola ne'e atu kolabora ho JSMP realiza programa ne'e.

Estudante feto hamutuk na'in 41 husi estudante siénsia sosiál umániora ema-nain 21 no siénsia teknolójia ema-nain 20 mak partisipa iha semináriu ne'e. Partisipante hirak ne'e maioria husi estudante 3<sup>o</sup> ano. Matéria sira ne'e diskuti no aprende durante semináriu ne'e mak kobre asuntu sira kona-ba knaar autór tribunál hanesan juis, prokuradór, defensor no advogadu. Alende ne'e, sira aprende mós kona-ba Lei Kontra Violénsia Doméstika no Kódigu Penál.

Objetivu husi semináriu ne'e atu motiva estudante feto sira hodi hili fakuldade direitu iha universidade bainhira sira remata estudu iha eskola sekundaria. Aleinde hasa'e kuñesimentu kona-ba sira nia direitu liga ho prosedimentu legál iha sistema justisa formal.

“Programa ne'e nu'udar estratejia JSMP hodi introdus no konsensaliza estudante feto sira kona-ba papel estratejiku husi autór judisiáriu sira, liu- liu partisipasaun feto no asegura iha balansu jéneru iha setór justisa formal,” dehan Luis de Oliveira Sampaio, Diretór Ezekutivu JSMP.

Mezmu semináriu ne'e realiza iha loron sorin deit maibé la hamihis entusiasmu husi estudante sira hodi hatu'o sira ninia preokupasaun kona-ba krime ho natureza violénsia doméstika, papél defensória públiku no advogadu privadu nomós kestaun kona-ba aplikasaun lei ba ema hotu ka ema balun de'it.

Diretór Eskola Sekundáriu Públiku Jerál Munisipiu Likísa representa husi Sr. Agostino Alves dos Santo iha nia abertura agradese ba JSMP tanba kontribui dezenvolve kapasidade estudante iha esperiensa hatudu katak estudante iha eskola ne'e husi siénsia teknólojia akaba estudu iha universidade husi fakuldade direitu.

Iha sesaun enseramentu ba semináriu ne'e, representante diretór eskola refere, akresenta tan katak informasaun ne'e sei benefisia estudante sira iha futuru. Xefe eskola ne'e mós agresede ba JSMP no husu atu kontinua atividade ne'e tinan ida dala rua no involve estudante husi 1<sup>o</sup> ano ho 2<sup>o</sup> ano tanba informasaun ne'e importante ba sira.

Programa ne'e realiza ho apoiu finanseiru husi The Royal Norwegian Embassy iha Jakarta, Indonézia

Atu hetan tan informasaun kompletu, favor kontaktu:

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)